

Muhdú pámeere páné iínújiri ijcyáné miamúnaa meijcyáiyóne

Tujkénúeju

Íhyaamtí pañétú caatúvané páné iínújĩlne múnáadítýúu tsaate tsatsíhvú idyóbéévéne muhdú miamúnaa meijcyáiyóné pityácójcatsíne.

Ditsiééberédípye 10-ri 1948 ijcyáné pijcyábari tsaate páné iínújĩlne túkevéjtsojtédítýú píhcyaaavé ipítýácójcatsí muhdú miamúnaa meijcyáiyóne. Á;áné dobéévé "Naciones Unidas" néemeé. Aaméhjáa téjyú caatúnú 30-neva miamúnaa maávyejúúlléíyonéhji. Aanéhjáa imí íjtsúcunúnéllii néeme ténehji páné iínújĩlne múnáake iúúbállémeíki. Téhduréhjáa néeme ténehji cáatúnúmeíháámí pahúllevávú pámehdívúré itsújááve téhaami ditye patsíhjívávúré iééveki.

Á;áné boonétúhjáa iñe méiínújí túkevéjtsojte téhdure ipíhcyáávéne nées páneere 30-nevaaa cáatúnúmeíñe muhdú néhdu meijcyáiyóné méiínújiri.

Aane ténehji méwáábyuta ijcyáhi. Á;nehji múu imíñeúvú iwáájácúne tehdu ijcyáhi. Aane tsá múu íhdyívúré pícyootúne. Múu íñahbémudívú pajtyétsó ténehji ditye iwáájácúne tehdu íjcyaki.

Pityájcoju íhdénúmeíñe

Muurá pámeere tsáápiitsa méboohówama meijcyane mewáájácúmeícyá botsíi máájýúiníyá muhdú imí meijcyáiyóne. Á;ánéllii tsá tsaate tsíjtyé hójtsí pañe meícyáítyuró ícubáhrádu. Tsá tsaate tsíjtyedi meícúbáhráítyuróne. Íllure mépiáábójcatsíyá pámeemáyé imí meijcyá tútávátsójcatsítýume.

Á;rone teene méboohówá íjcyaróné mewáájácútúné nájcaúvú muurá tsaate muhdú imí meijcyáiyódú íjcyatúmé illure tsaatédí ícubáhrahíjcyáhi. Aane ehdu ditye méénune pámeere miamúnáadivuro ímityúne. Muurá pámeere íínújiri ijcyáné miamúnaa méijyácunúrá tsáimíyé meijcyáiyóneri. Tsá múha méhdivu túútaválléítyuró meíhjuváne, íiná mecáhcujsónee, íjcyane. Aame tsá íñneri meíllityéítyuróne. Tsá píhtójú pañe meíjcyáítyuróne. Ehdu meijcyane pámeere miamúnaa imí méijtsúcunúhi.

Ehdu ímityúné medárlílvéjcatsííyóné íhdétú íjcyáiyóné mééma túkevéjtsojúúne. Muurá tsaate ímityúné meke méénúhajchíí téénej tééveri tsáimíyé méimíbáchójcatsíhi. Muurá tene ijcyátuca tsáijyú máavyéjújte íjcyáromema mémúnáátsójcatsíyáhi.

Aane mewáájácucáro téénej tééveri pahúllevá iínújĩlne múnáama imí meijcyáiyáhi. Tsá tsaatéke menéhnílléítyuróne. Muurá pámeere miamúnaa íínújiri meijcyame méimíllé tsahdúré imí meijcyáiyóne.

Muuráhjáa 'Páné Iínújĩlne Múnáá Pihcyááve' némeíñe pañe tsúúca ítsaavémé muhdú pámeere miamúnaa wajpíimumáyé walléémú meijcyame tsahdúré maávyejúúlléjcatsííyóne. Aame mépiáábójcatsíyá panéjcuávú tsahdúré pámeere imí meijcyaki. Á;áné pityájcoju iñe muhdú miamúnáake mepiáábóíyóné tsúúca mééma íjcyáneri méwaajácutsó páhduube cómíñe múnáajpi méboohówama meijcyane ditye íávyejúúlléne icyáhcújtso imí íjcyaki.

Muuráhjáa 'Páné Iínújĩlne Múnáá Pihcyááve' némeíñe pañe íjcyame nées páhduube cómíñe múnáajpi méboohówama, méijtsútuma, meijcyame maávyejúúlléjcatsímyé múhójtsí pañe meijcyátuki. Aamée pítyácójcatsí muhdú miamúnáake ipiááboíñe imí ditye íjcyaki.

Aane ímiáané tehdújuco pámeere wáájacíyóné muhdú túkevéjtsoju néhdu meíjcyame maávyejúúlléjcatsíiyóne.

Ahdícyane 'Páne Iñújiíne Múnáá Pihcyááve' némeiñé pañe íjcyame nées ténehji néhdu páhduube ííñújiri íjcyané miamúnáajpi méíjcyáiyóné méwáábyuta tene íjcyanélliíhye. Á;áneri meljyacunúiyá muhdú tene néhdu meíjcyáiyóneri. Á;hdure tsíjtyeke méúwáábóiyá méiíñúji múnáa íjcyátúróméhjimájuco ditye tehdu íjcyaki. Ehdu imí méíjcyáiyá tsúúca teene mewáájacúmé teenéi wáájacutúmé pamévamáyé.

Á;ané túkevéjtsojúúné illu nééhii:

1. Túkevéjtsoju

Pámeere ííñújiri meíjcyame tsá múhójísí pañé ícubáhrádú meíjcyáítyuróne. Pámeere tsahdúré imí meíjcyame mewáýújcatsííne mépiáábójcatsíiyá tsaatéké éhdiíwálletúmé ehne múu mépañétúéné nahbémuma meíjcyadu.

2. Túkevéjtsoju

Ííne íhyaamítú muhdú tene cáátuvádú méíjcyáiyá pamévamáyé memúnáa íjcyátúrómema. Tsahdúré meijtsúcunúiyá pamévakéré wajpímuke, walléémuke, pahdúváré méjpííhañe menéérómeke, pahdúváré meihjyúvárómeke, muhdú Píívyéébeke cáhcújtsórómeke, tsáijyu múúne tsaate múhdurá túkevéjtsojtédítýú íjtsámeíyómeke, tsíííne ííñúji múnáa íjcyárómeke, íhtsútúmeke, ídáátsórómeke, muhdíívátsihjívú tsímávámeíyómeke; pámeekéré tsahdúré meijtsúcunúiyá tsaatéké éhdiíwálletúme.

Téhdure tsá múhdurá meijtsúcunúítyuró tsáijyu múúne tsaate túkevéjtsojte múhdurá ííñúji múnáake túkévéjtsórómeke. Tsá ditye ítyaúhbjáúúné múhdurá méénúróné pañe íjcyámeke meéhdííválléítyuróne. Tsané ííñúji múnáa tsaaté hójtsí pañe múhdurá íjcyárómeke tsá meéhdííválléítyuróne. Tsahdúré meijtsúcunúiyá iye túkévéjtsómeíyómema diityéke.

3. Túkevéjtsoju

Páhduube imí méíjcyáiyáhi. Á;ámeke tsá múha íínerí meke ipátsaríjcyómeke tútávájtsóítyuróne.

4. Túkevéjtsoju

Tsá tsaate meke íhyójtsí pañévú pícyoome ícubáhrádú meíjcyame diityé íicúve múnáa meíjcyáítyuróne. Tsá muucá miamúnáadívú menáhjhénúítyuróne. Eene tsáma ávyeta tsá ímíllémeítyúne.

5. Túkevéjtsoju

Tsá tsaatédí meícubáhráítyuróne. Tsaatéké méúwáábócooca chooco méúwáábóiyáhi. Tsá meméénúítyuró iyáábeke múu méénudu.

6. Túkevéjtsoju

Páhduube miamúnáajpi ííne méiíñújiri ihdyícyátsii meíjcyarómé téhdure meíjcyá teene túkevéjtsojúúné pañe. Aame mépiivyété tsaatéké menééne méwáábyuta páme wáábyutaré tene íjcyane meke ipíááboki.

7. Túkevéjtsoju

Tsáné ímibájchoju tsaatémá meméénúcooca tsá tsaatékére mepíáábóityuróne. Pámeemáyé tsahdúré ímibájchoju méénúmeíiyá muhdú ímichi teene taúhbaju néjijtóri.

8. Túkevétsoju

Pámeere míamúnáama ímityúnéhjí ímibájchoobe ímibájchóiyá tehdiívane diityémá pájtyécooca muhdú taúhbaju néhdu tsaatéké éhdiívállétuubére.

9. Túkevétsoju

Tsá tsaatéké peecúteré meékéévéne mecúvejáánúityuróne. Téhdure tsá peecúteré tsaatéké méiínújitu meíjchívyétsóityuróne.

10. Túkevétsoju

Tsaate tsíjtyé hallúvú ímityúnéhjí ímibájchóóbeke úúbálléijvu dííbye éllevu péémema ímíneúvúré ímibájchóíyoobe muucá éhdiívállétuubére. Á;rónáa ihdyu tsá díbye tsaatékére píáábóityuróne. Méénúíyoobe muhdú teene taúhbaju néhdu tsahdúré pámeemáye.

11. Túkevétsoju

Tsaate tsíjtyé hallúvú imityúné úúbállécooca tsá peecúteré menééítyuro ímiáané tehdujuco tene íjcyane. Tujkénú pañetu úúbállémeíiyómé muhdú tene íjcyane ímíneúvú mewáájácuki.

Muurájháa taúhbajúi ímíneúvú pánéévéetúnáa tsaate múhdurá íjcyarómé hallúrí tsá pahdu íiná íjcyatúne. Á;ijyúu ímityúné méénúomeke tsá icyooca íjcyané taúhbaju néjijtóri meúwáábóityuróne. Méúwáábóiyá téijyúu íjcyané taúhbaju néjijtóri. Á;rónáa ihdyu icyooca tsaate ímityúné méénúhajchíí botsíi meúwáábóiyá muhdú icyooca íjcyané taúhbaju néjijtóri.

12. Túkevétsoju

Tsá tsaatéké íínerí mepátsaríjcyóityuróne; tsá tsaaté já mepátsaríjcyóityuróne; tsá tsaate tsíjtye éllevu wállóóné waajácúháaimí meéévéítyuróne; tsá tsaatédítyú néhnijyu mewááóityuróne. Ehdu nénéhí íhdétú íjcyané mééma taúhbajúúné páme wáabyuta meke tene ityéhmeki.

13. Túkevétsoju

Tsáné íiínújiri meíjcyame mépiivyété mepééiyóné kiávú méimilléhullévu. Aame meíjcyáiyá kiá meímíllétsihyi.

Muurá pamévaré mépiivyété tsííñé íiínújivu mepééiyóne. Aame méóómíiyá méiínújivu meímíllécoóca. Aane tsá múha meke tsáhájtsóityuróne. Muurá mépiivyété mepééne meímílléhajchíí téhulle meíjcyaki.

14. Túkevétsoju

Muurá méiínújiri ícúbáhraméí pañe meíjcyáhajchíí mépiivyété mepééiyóné tsííñé íiínújivu. Á;ané íiínúji múnáa tsáimíyé meke waatsúcúpéjtsóiyá imí diityémá meíjcyaki. Tsá meke ditye catúhtsópéjtsóityuróne.

Á;rónáa tsáijyu múúne méhdityuré íjcyane ímityú medáríívemeíhijcyámé ihdyu tsá mepívyetétú tsííñé íiínújivu mepééiyóne. Awáaréjuco íñe muhdú íhyaamí pañétú tene

néhdu meíjcyátúhajchíí muurá tsá mepééítyuróne.

15. Túkevéjtsoju

Pamévare míamúnaa méijcyá tsané iínúji múnáa. Aane tsá múha meke nééítyuró tsané iínúji múnáa meíjcyatúne.

Téhdure tsá múha meke peecutére wállóóítyuró tsííne iínújivu. Téhdure idyé tsá múha meke nééjuri tsííne iínúji múnáajpíyéjucó meíjcyáítyuróne.

16. Túkevéjtsoju

Pamévare míamúnaa wajpíímumáyé wallémú piivyeté ityáábávajcatsíne iééve úújetétsihvu iímílléhajchííjyu. Aame tsúúca tsája múnáa íjcyame piivyeté ítsíimaváne. Á;ánetu tsá múha diityéké tsáhájtsóítyuróne. Tsá muhdú tene néetu muutéhji ditye íjcyane, muhdú Píivyéébeke ditye úraavyéne. Muurá pámeere piivyeté tyáábávajcatsíne. Aane diitye táábávajcatsímyé avyējúúlléjcatsíiyá tsahdúre. Téhdure wáágóójcatsíyómé avyējúúlléjcatsíiyá tsahdúre.

Á;ánetu tsá muucá metáúhbaítyuró ditye ityáábávajcatsíki. Caatyé ityáábávajcatsíne imillémé pañetu iye iímílléhajchíí piivete ityáábávajcatsíne.

Muurá ihdyu pañetu meíjcyájucó teene tsája múnáa méijcyane. Aame pámeere méijcyá tsahdúre meinuji túkevéjtsojié túkevéjtsójú pañe.

17. Túkevéjtsoju

Muurá pámeere tsáápiitsa méijcyátsíhji méijcyáiyá meímílléhajchííjyu. Téhdure tsaaté múnáa ilinújima íjcyáiyá iímílléhajchííjyu. Aane tsá múha tsáhájtsóítyuróne.

Aane tsá peecutére múhdityú íjcyátsíí múha dójtúcúítyuróne.

18. Túkevéjtsoju

Pámeere míamúnaa mépiivyeté muhdú meíjtsámeídyú meíjcyáiyóne, kéjijtóri Píivyéébeke meúraávyéiyóne. Téhdure mépiivyeté tsájijtótú tsíjijtóvú mepájíyeyóne muhdú meímíllédu. Aame idyé mépiivyeté iiná meíjtsámeíñeri, iiná mecáhcújtsóneri meíhjúváiyóne mééréétsihvu. Téhdure mépiivyeté medóbéévétsihvu tsíjtyeke meúwáábóné keená eúraávyejjto.

19. Túkevéjtsoju

Pámeere mépiivyeté iiná meíjtsámeíne meíjyújcaáyóiyóne tsijtye iwáájacuki. Aane muhdú meíjtsámeíne meíhjúváné hallútú tsá múha meke tsáriíléítyuróne. Muurá mépiivyeté panévare mewáájane. Téhdure mépiivyeté muhdú tsíjtyé íjtsaméí íjcyane mewáájacúné waajacúhaamíne meéévénej tééveri. Muurá idyé mépiivyeté iiná meíjtsámeíne mecáátunúne, meúwaabóne. Aane pámeere mépiivyeté ihdyícyáhullévú tsííne iínújinévú metsújaúcúne. Íñehji pámeere mépiivyeté meméénune mecáátúnúneri, meíhjúváneri, panévariye muhdú meímíllédu. Á;áne hallútú tsá múha meke iiná nééítyuróne.

20. Túkevéjtsoju

Pámeere mépiivyeté tsatsíhvú medóbeevéne mepítyácójcatsíki. Téhdure mépiivyeté tsáha múnáa tsané wákimyei meenuhá pañévú meúcaavéne.

Á;rónáa ihdyu tsá múha meke ávyeta táúhbaítyuró tsáha múnáajpi méijcyaki.

21. Túkevéjtsoju

Pámeere mépiivyéterá méiiñújí túkevéjtsojie ijcyáha múnáá pañévú meúcaávéiyóne. Meere meúcaavéné mepívyetétúhajchíí tsíjtyeke meméménúmeke méwáállóóiyá mecápayóóve.

Muurá pamévare mépiivyéterá méiiñújí túkevéjtsojte níwáavéné wákimyéiháñé meméénúiyóne.

Muurá pámeere míamúnaaré mémenúme tsané iiñújí túkevéjtsojte ijcyáhi. Teene meenúme caatyéké ityújkevééllémeke téévéneúvúré imyéménúneri. Aane tsá tsaatére pívyetétú teene imyééñune. Muurá pámeere mépiivyété memémenúne. Á;rónáa tsá múha meke táúhbaíturó tsaate metújkevééllétúmeke meméménuki. Meere pánetu caatyé meíjtsúcunúmeke méméménúiyáhi. Téhdure idyé méméménúiyá tsaatéke muhdú meímílléjítori. Á;rónáa ihdyu ímíñeúvú tene ijcyáiyódú méméénúiyáhi.

22. Túkevéjtsoju

Pámeere méhdi ijcyáiyóné íñe tájpi meíjcyane. Á;nejcútú méiiñújí avyéjujte meke píáábóiyá ipívyetédúneri. Téhdure tsíñéhjí iñújine múnáa dsídsivámé meke píáábóiyá íñe tájpi meíjcyáiyóné meíjcyátsótúmeke. Aame íná meke píhtotúme tsúúca imí mepánéévémedi tsá múha méhdi úúhívatéítyuróne. Ehdu méijcyáiyá imí memúnáama meíjcyame meúraávyé méíhdé múnáaúvúu úráávyehíjcyánetu kéjítójí imí meíjtsúcunújítóji.

23. Túkevéjtsoju

Pámeere mépiivyété méwákimyéma meíjcyáiyóne. Á;rónáa idyé tsá téeneri ávyetá icúbáhaméí meméénúítyuróne. Aane teene wákimyéí túkévejtsómé tsáimíyé meke túkévéjtsóiyáhi. Á;ánetu tsáijyu múúne tsaate íwákimyéma íjcyátúhajchíí pamévare mepíáábóiyá téhdure íwákimyéma ditye íjcyaki.

Pámeere mépiivyété tsahdúré meújcúiyóné méwákimyéí áhdó muhdú mewákímyeíñé tujkévevu.

Pámeere wákimyéí múnáa íná íwákímyeíñe áhdó újcúiyá téene tájpi ísímema imí íjcyame íávyejúúllémeíki. Aane tsáijyu múúne tsaaté wákimyéí áhdó úújetétúhajchíí tsíjítóriyéjuco díityéké tene áhdómeíiyóné tsijtye díityéké píáábóneri.

Pámeere wákimyéí múnáa piivyété idyóbéévéne ipityácójcatsíiyóné muhdú iwákimyéí tsíñéhjíma íjcyane ímíbáávyétsoki.

24. Túkevéjtsoju

Pámeere mépiivyété méwákimyéítyúi tsarahja mewáyééévéiyóne. Aane tsá méwákimyéí mepátyéévétsóítyuróne. Eeveríyé méwákímyeíiyáhi. Muurá téenélíi íjcyáné téenetu mewáyééévehíjcyárahji. Á;rójcoojíi áhdó meújcúiyá téjcoojíi mewákímyeítyúrónáaaca.

25. Túkevéjtsoju

Pámeere mépiivyété tsáimíyé meíjcyáiyóné méétsímema. Aame mejháháñema meíjcyámedítú tsá majcho, wájyamu, tsíñéhjí íñe tájpi meíjcyáiyóné píhtóítyuróne. Mechémécooca métáábímyeíiyáhi. Ijcyáné tsíñéhjí téhdure imí meke píáábóiyonéhjí. Á;nejcúhítu mépíáábójcatsíiyá imí tsaméhjí meíjcyaki. Tsaate íwákimyéma íjcyátúmeke mépíáábóiyá ditye téhdure íwákimyéma íjcyaki. Téhdure kéémemu,

píibáyyujte tsijtye ídátsó néeme iwákímyeíyóné píivyetétúmeke mépiáábóiyáhi.

Téhdure idyé walléémú éévájtema tsiiniéwuúmuke tsaímíyé météhméiyá imí ditye ijcyaki. Tsá apáámyéré imí ityáábávájcatsíñe tsímáváméj tsímeke metéhméityuróne. Téhdure imí táábávájcatsítyúróméj tsímeke tsaímíyé météhméiyáhi.

26. Túkevétsoju

Pámeere mépiivyété waajácúhaamíé mítéiyóne. Tsá tsiime waajácúhaamíné ítetúmé ijcyáityuróne. Imíllémeiñé pámeere tsiime waajácúhaamíné ítéiyóne. Aane tsá áhdómeítyúne. Téhdure pámeere mépiivyété éhniíñevújuco ijcyáné uwáábovu meúcaávéiyóné méwákímyéima meijcyaki. Tsá tsaaté wáabyutaré tene ijcyáityuróne.

Pámeere uwáábó ijcyá méwáabyuta meke tene wájácúúvetsómé pamévakéré maávyejúulleki. Aame tsá meéhdíiválléityuró tsííñé iñúji múnáa, tsíjyúhjiri íhyyuvámee, Píivyéébé icyánéjcu pahdúváré úráávyerómee, ijcyámeke. Á;ánej tééveri 'Páné Iñújíñe Múnáá Pihcyááve' némeímyé túkevétsoju néhdu páhduube cómiñe múnáajpi imí ijcyaki.

Muurá pámeere mépiivyété méétsíimeke keená imí meijtsúcunúné ditye áábohíjcyátsihvu meúacóiyóne.

27. Túkevétsoju

Pámeere mépiivyété muhdúhjáa meíhdé múnáaúvú icyahíjcyánetu imí meijtsúcunújitóji meúráávyéiyóné majtsíháñe, nuutáháñema tsíñehji imí nénehji. Á;néhjitu tsá múha meke píivyetétú ibóijcyúiyóne. Téhdure tsíñehji éhniíñevu mépiivyété mewáájácúiyóné méicyánéjcuene ijcyátúronéhji keená meke píááboiyonéhji mewáájácuki.

Pámeere mépiivyété meméénúiyóné tsane, mecaátúnúiyóné tsané íjtsaméi. Á;néhji hallúvú ímichi teene méénume dsíidstváiýáhi. Tsá tene ímíllémeítyú tsane meméénune tsijtye iékéévéne hallúvú dsíikístváiýóne.

28. Túkevétsoju

Pámeere tsíñéhji iñújíñe múnáama mépiivyété meijcyáiyóné túkevétsojú pañe imí meijcyaki. Á;ánélliihyée muurá páhduube panéva iñújíñe múnáajpi idyóbéévéne meenú túkevétsoju. Aane tútávájtsóiyóné taúhbaju muurá tsá ijcyatúne. Ehdu ijcyáiyóné muhdú íhyaamí pañétú tene néhduú.

29. Túkevétsoju

Pámeere máhallúrí teene memúnáama imí meijcyánetu meke píaabóné meméénúiyóne. Á;ánetu méwaajácúiyá ímíáané tsúúca mewájácuuvéjucóomé imí mepáneevéne.

Á;ánéllii tsúúca ijcyáné mééma panévatúré meke túkévéjtsóiyóné taúhbajúúné pámeere tsahdúré imí meijcyaki. Aame tsá metútávátsójcatsítyuróne. Pámeere pátsáricyójcatsítyúmé meijcyáiyá tsahdúré imí meijcyaki. Tsá múha píivyetétú íimíllédú meke idyárhívéiyóné tehdu múhójtí pañé meijcyámekéjívarí.

Muuráhjáa íñe túkevétsojúúné néhdu tsaímíyé méijcyáiyáhi. Aane tsá múha tsíhdyúrétsoítyuró 'Páné Iñújíñe Múnáá Pihcyááve' némeiñé pañée ijcyame méénúné túkevétsojúne.

30. Túkevéjtsoju

Páneere iñe íhyaarní pañe ijcyáné túkevéjtsoju méénúmeíñé tsá múha tsíñejcúvuré illéébóne ímillédú tsaatéké dárívéityuróne. Tsáijyu múúne tsaápi, tsaáte, méiñújí túkevéjtsojte ijcyarómé tsá tehdu méénúítyuróne.